

दिनांक : 14.09.2026

समय : 18.45 बजे

- नगरीय निकाय चुनाव मांय भाजपा रो पलड़ो भारी-जयपुर, कोटा, उदयपुर अर भीलवाड़ा नगर निगम मांय भाजपा ने पूरो बहुमत मिल्यो।
- बीकानेर अर पाली नगर निगम मांय कांग्रेस ने जीत मिली-अजमेर मांय पार्टी ने बढ़त-भरतपुर नगर निगम मांय निर्दलीय रा तौर ऊं जीतण वाळां रो दबदबो।
- राज्य मांय बारिश आवता दो दिन ताई जारी रेहवण रा आसार।
- गणेश चौथ रे मौके पूरा प्रदेश मांय गणपति बप्पा मौर्या री गूज-न्यारी-न्यारी ठौड़ां काल शोभायात्रावां निकाळी जावेला।

000

प्रदेश मांय 309 नगरीय निकायां रा लारला दिनां व्ह्या चुनाव मांय भारतीय जनता पार्टी ने बढ़त मिली है। 10 नगर निगमां, 47 नगर परिषदां अर 252 नगर पालिकावां रा 10 हजार 245 वार्डा री ई.वी.एम. मांय बंद वोटों री आज संवारे 8 बज्यां गिणती सरु व्ही। राजधानी जयपुर, कोटा, उदयपुर अर भीलवाड़ा नगर निगम मांय भाजपा ने साफ़ बहुमत मिल्यो है। अलवर मांय भाजपा ने बढ़त मिली है, जदके बीकानेर मांय कांग्रेस ने स्पष्ट बहुमत मिल्यो है। कांग्रेस ने अजमेर अर पाली मांय बढ़त हासिल व्ही। भरतपुर रा 65 मांय ऊं 38 वार्डा मांय जीत र निर्दलीय उम्मीदवार मोटी कामयाबी हासिल कीनी। जोधपुर नगर निगम री 100 मांय ऊं भाजपा अर कांग्रेस दोन्यू ने 44-44 सीटां मिली जद के 11 वार्डा मांय निर्दलीय उम्मीदवार जीत्या है। 47 नगर परिषदां मांय ऊं 21 मांय भाजपा अर 17 मांय कांग्रेस ने बढ़त हासिल व्ही। 252 नगर पालिकावां मांय ऊं 144 मांय भाजपा अर 92 मांय कांग्रेस जीत हासिल कीनी। राज्य मांय सत्ताधारी भाजपा अर विपख री खास पार्टी कांग्रेस, दोन्यू ई चुनाव मांय जीत रो दावो कीनो है। अब ऊं थोड़ी देर पैली, जयपुर रा प्रदेश भाजपा कार्यालय मांय मुख्यमंत्री भजनलाल शर्मा खबरनवीसां सागे बातचीत करता थकां कह्यो के जनता प्रधानमंत्री नरेन्द्र मोदी अर राज्य री मौजूदा सरकार रा कामकाज माथे भरोसो जतायो है। वे कह्यो के जनता राज्य री मौजूदा सरकार रा अढाई साल रा कामकाज माथे सहमति छाप लगायी है।

.....

दूजी कानी राज्य रा पैली वाळा मुख्यमंत्री अर कांग्रेस रा आला नेता अशोक गहलोत निकाय चुनाव रा नतीजां माथे प्रतिक्रिया देता थकां भाजपा माथे मनमान्या तरीका ऊं परिसीमन कर र सरकारी मशीनरी रो दुरुपयोग करण रो आरोप माण्ड्यो। वे पुलिस री भूमिका माथे ई गंभीर सवाल उठाता थकां इण ने दुभांत करण वाळी बतायी। प्रदेश कांग्रेस अध्यक्ष गोविंद सिंह डोटासरा जयपुर मांय खबरनवीसां सागे बातचीत करता थकां कह्यो के ई चुनाव मांय पूरो ज़ोर लगायां पाछे ई भाजपा ने छावतो जनादेश नी मिल्यो है।

.....

स्थानीय निकाय चुनाव रा नतीजां माथे अलवर मांय प्रतिक्रिया देतां थकां विधानसभा मांय विपख रा नेता टीकाराम जूली भाजपा माथे सरकारी मशीनरी रो बेजा इस्तेमाल करण रो आरोप मांड्यो। वे पुलिस री भूमिका माथे गंभीर सवाल उठाता थकां जीतण वाळां ने तोड़बा री कोशिश करणं रो आरोप लगायो। निकाय चुनाव रा नतीजां रा बारा मांय और जाणकारी म्हाणा खबरनवीस ऊं -

ई बीचे, स्थानीय निकायां रा अध्यक्ष ओहदा सारु चुनाव री अधिसूचना काल जारी करी जावेला। पर्चा 16 सितम्बर ताई दाखिल करया जा सकेला। अध्यक्ष ओहदा सारु 21 सितम्बर ने वोट पड़ेला अर वां ई दिन नतीजा रो ऐलान कर दियो जावेला। 22 सितम्बर ने उपाध्यक्ष रो चुनाव व्हेला।

000

केन्द्रीय गृह अर सहकारिता मंत्री अमित शाह आज नवी मुम्बई मांय राख्यी ज्या अखिल भारतीय राजभाषा सम्मेलन मांय राजभाषा गौरव अर राजभाषा कीर्ति पुरस्कार 2025-26 दीना। गृह मंत्रालय रा राजभाषा विभाग री ओर ऊं राख्या जा रह्या दो दिन रा ई सम्मेलन रा उदघाटन सत्र मांय गृह मंत्री राष्ट्रगीत वंदे मातरम् ने देश रो गौरव बतायो।

.....

000

आज विश्व हिन्दी दिवस है। साल 1949 मांय आज हीरा दिन संविधान सभा देवनागरी लिपि मांय लिखी हिन्दी ने देश री आधिकारिक भाषा रा तौर ऊँ काम लेवणो तैय कीनो हो। दुनिया मांय सब ऊँ बत्ती बोली जावण वाळी भाषावां मांय शामिल हिन्दी 52 करोड़ ऊँ बत्ता लोगां री बत्ती भाषा है। हिन्दी बातचीत रो जरियो व्हेवण सागे ई संस्कारां री ई पहचान है। हिन्दी रा नामी कथाकार अर समालोचक नंद भारद्वाज आकाशवाणी सागे बातचीत करता थकां कह्यो के हिन्दी बोलण, बांचण अर माण्डण सागे ई इण ने और आगे बधावण री कोशिश करी जावणी चाहिजे।

000

राज्य मांय चौमासा री बिरखा फिलहाल मंदी पड़ गयी है, हालांकि राज्य रा लंकाऊ अर लंकाऊ—ऊगणी हलकां मांय 16 सितम्बर तांई बिरखा व्हेवण रा आसार है। ई बीचे आज भीलवाड़ा मांय दोपहरां पाछे थोड़ी देर तांई झमाझम मेह बरस्यो। जालौर जिला रा आहौर अर बागोड़ा मांय ई चोखी बिरखा व्ही। भीनमाल अर सायला मांय रिमझिम बारिश व्ही। इण ऊँ पैली बांसवाड़ा, डूंगरपुर, चित्तौड़गढ़, प्रतापगढ़ अर सलूमबर जिलां मांय कटे—कटे चोखो मेह बरस्यो। जयपुर, अलवर, कोटपूतली—बहरोड़, खैरथल—तिजारा, भीलवाड़ा, कोटा, बारां अर झालावाड़ जिलां मांय ई हल्की ऊँ मझला दर्जा री बिरखा व्ही। दूजी कानी प्रदेश रा आतूणी हलका मांय घणखर ठौड़ां आधो भादवो निकळ्यां पाछे ई गर्मी अर उमस रो असर है। श्रीगंगानगर मांय पारो 40 डिग्री सेल्सियस कने जद के बाड़मेर अर जैसलमेर मांय ई अधिकतम तापमान 39 डिग्री सेल्सियस ने पार कर ग्यो।

000

मुख्य सचिव वी. श्रीनिवास आज उच्च अर तकनीकी शिक्षा विभाग रा अहलकारां सागे मीटिंग कर र महकमा री न्यारी—न्यारी योजनावां अर कामां रो जायजो लीनो। वे नौजवानां ने आला दर्जा री भणार्—लिखाई सागे विषय ऊँ जुड़्या उद्योगां मांय व्यवहारिक अनुभव देवण सारु अप्रेंटिसशिप एम्बेडेड डिग्री प्रोग्राम ने असरदार तरीका ऊँ लागू करण बाबत् कह्यो। मुख्य सचिव पन्नाधाय बाल गोपाल योजना रा तैत स्कूलां मांय दूध पाउडर नियमित तौर ऊँ पूगावण अर आपूर्ति श्रृंखला री लगातार निगराणी करण सारु कह्यो।

000

गणेश चौथ आज सिरधाभाव सागे मणायी जा रही है। ओ दिन सब ऊँ पैली पूजा जावण वाळा गजानन्द जी रा जन्म रो प्रतीक मान्यो जावे है। भगवान गणेश ने बुद्धि, विवेक, ज्ञान, समृद्धि अर सौभाग्य रा देवता मान्या जावे है। गणेश चौथ रे मौके राजधानी जयपुर रा मान्योड़ा मोती डूंगरी मिन्दर मांय दर्शन करण वाळां री लम्बी लेणां निजर आ रही है। रणथम्भौर मांय भर रह्या त्रिनैत्र गणेश मेळा मांय ई मोटी तादाद मांय जातरु त्रिनैत्र गणेश जी रा दरबार मांय पूजा—अर्चना कर र सुख समृद्धि री कामना कर रह्या है। बाड़मेर जिला मांय रातानाड़ा रा गणेश मिन्दर मांय भक्ति रो वातावरण बण्योड़ो है। राजधानी जयपुर समेत न्यारी—न्यारी ठौड़ां काल गणेश जी री शोभा यात्रा निकाळबा रा कार्यक्रम राख्या जावेला।

000

भारतीय रिजर्व बैंक साइबर धोखाधड़ी, विवादित लेनदेन अर ठगी रे जरिये हासिल करी ज्यी रकम जमा करावण सारु किराया रा खाता ऊँ जुड़्या मामला रा निपटारा सारु नुवो मसौदा जारी कीनो है। सुप्रीम कोर्ट रा हुकम पाछे तैयार करी ज्यो मसौदा रो मकसद साइबर ठगी री जांच रा नाम ऊँ पूरा खाता ऊँ लेन—देन माथे बेमियादी बगत तांई रोक लगावण री बजाए शंका वाळी रकम ने ई रोकणो है। बैंक आ रोक बत्ता ऊँ बत्ता 60 दिन तांई लगा सकेला। मसौदा रे मुजब किण ई लेन—देन माथे शंका व्हेवण री सूरत मांय बैंक ग्राहकां ने इण री जाणकारी देवेला। ग्राहकां ने लेन—देन री वैधता साबित करण सारु 20 दिन मिलेला, जद के बैंकां ने ग्राहकां रा जवाब री 10 दिन मांय समीक्षा करणी व्हेला। ग्राहक कानी ऊँ तैय मियाद मांय जवाब नी देवण री सूरत मांय बैंक मामला नेशनल साइबर क्राइम रिपोर्टिंग पोर्टल रे जरिये पुलिस ने सौंप देवेला।

000

कोलकाता मांय व्ही अखिल भारतीय अंतर रेलवे एथलेटिक्स चैंपियनशिप मांय उत्तर—पश्चिम रेलवे रा खिलाड़ी सोना रा चार अर कांसा रा 3 तमगा हासिल कीना है। उत्तर—पश्चिम रेलवे रा मुख्य जनसंपर्क अधिकारी अमित सुदर्शन आ जाणकारी दीनी।

000